

**आकाशवाणी**

खबरां

1. प्रधानमंत्री नरेन्द्र मोदी अज्ज तमिलनाडु दे म्हान चोल सम्राट राजेंद्र चोल प्रथम हुं'दे जयंती समारोह च हिस्सा लैडन। श्री मोदी गंगईकोंडा चोलपुरम मंदरै च आदि तिरुवतिरई महोत्सव च बी शामिल होडन।
2. प्रधानमंत्री नरेन्द्र मोदी अज्ज दिनें 11 बजे अपने माह्वार रेडियो कार्यक्रम "मन की बात" दे राएं देश-बदेश च रौहने आहले लोकें कन्नै अपने बचार सांझे करडन।
3. प्रधानमंत्री नरेन्द्र मोदी, 75 फीसद रेटिंग दे कन्नै दुनिया दे सबभनें शा लोकप्रिय लोकतांत्रिक नेता दे रूप च उभरे ना।
4. मौसम विभाग नै पच्छमी मध्य प्रदेश, पूर्वी राजस्थान ते गुजरात च अज्ज बड़ी मती तेज बरखा दी रेड अलर्ट आहली चेतावनी जारी कीती ऐ।
5. जॉर्जिया दे बटुमी च आयोजित फिडे महिला शतरंज विश्व कप दे फाइनल च भारत दी कोनेरू हम्पी ते हमवतन दिव्या देशमुख मझाटै पैहला मुकाबला ड्रा होआ ऐ। दुआ मुकाबला अज्ज खेड्डेआ जाह्ग।

<><><><><><>

**PM-Chola**

प्रधानमंत्री नरेन्द्र मोदी होर अज्ज तमिलनाडू दे गंगईकोंडा चोलपुरम मंदरै च आदि तिरुबंतीरेई महोत्सव दे कन्नै महान चोल सम्राट राजेंद्र चोल प्रथम हुं'दी जयंती दे उपलक्ष्य च आयोजित समारोह च हिस्सा लैडन। मोदी होर भारत दे महान सम्राटें चा इक्क राजेंद्र चोल प्रथम हुं'दे सम्मान च इक्क स्मारक सिक्का बी जारी करडन। एहू विशेष समारोह राजेंद्र चोल प्रथम हुं'दे दक्खन पूर्व एशिया दे परौराणिक समुंद्री अभियान दे 1 ज्हार ब'रे पूरे होने दा बी चेत्ता नोआंदा ऐ।

<><><><><><>

**PM-TN**

प्रधानमंत्री नरेन्द्र मोदी होरें मालदीव शा परतोने मगरा जंदी राती तमिलनाडू दे थुथुकुडी च 4 ज्हार 800 करोड़ रपे शा बद्द दी लागत आहलियें बक्ख-बक्ख विकास परियोजनाएं दा नीहू पत्थर रक्खियै उद्घाटन कीता ते केइयें गी राष्ट्र दे नमित्त कीता। एहू परियोजना तमिलनाडू दे लोकें दे जीन दे तौर-तरीकें च सुधार लेआडन। क्षेत्रीय संपर्क गी होर बधाडन, स्वच्छ उर्जा ते बुनियादी ढांचे गी होर मजबूत करडन। एहू पैहल प्रमुख क्षेत्रें च फैली दी ऐ जेदे कन्नै ब्हाई अड्डे, जरनैली शिडका, रेलवे ते महत्वपूर्ण बिजली क्षेत्र दी प्रगति शामिल ऐ। लोकें दे कट्टु गी संबोधित करदे होई प्रधानमंत्री होरें अपने विदेशी दौरै दरान भारत ते ब्रिटेन बश्कार ऐतिहासिक मुक्त बपार समझौते पर होए दे समझौते पर लो पाई। उनें गलाया जे एहू मुक्त बपार समझौता भारत दी अर्थ बवस्था गी मजबूत करोग ते दुनिया दी त्री सबभनें शा बड़ी अर्थबवस्था बनने च देश दी जात्तरा गी होर अगगे लेइयै आने च महत्वपूर्ण भूमिका निभाग।

<><><><><><>

**PM-MKB**

प्रधानमंत्री नरेन्द्र मोदी अज्ज दिनें 11 बजे अपने माह्वार रेडियो कार्यक्रम "मन की बात" दे राएं देश-बदेश च रौहने आहले लोकें कन्नै अपने बचार सांझे करडन। एहू इस कार्यक्रम दी 124मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नो आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुं'दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाह्ग। आकाशवाणी आसेआ मन की बात दे तुरत मगरा एहदा डोगरी भाशा च अनुवाद प्रसारत कीता जाह्ग जिसी तुस रातीं 8 बजे इक बारी परतियै बी सुनी सकदे ओ। आकाशवाणी दा क्षेत्रीय समाचार एकांश जम्मू अज्ज रातीं साड्डे 10

बजे “मन की बात” पर इक बशेश परिचर्चा बी प्रसारत करोग जेहदे च मेहमान होडन वरिष्ठ पत्रकार प्रदीप दत्ता ते इंदे कन्नै गल्लबात करडन न्यूज एन्कर विजय बजाज।

<><><><><><>

## PM-Rating

प्रधानमंत्री नरेन्द्र मोदी, दुनिया दे सब्भनें शा लोकप्रिय लोकतांत्रिक नेता दे रूप च उभरे ना। अमरीका च स्थित डेटा एनालिटिक्स फर्म ‘मॉर्निंग कंसल्ट’दे इक सर्वेक्षण च श्री मोदी होरें’गी 75 फीसद रेटिंग मिली ऐ। सर्वेक्षण च प्रधानमंत्री मोदी होरें’गी दुनिया च अपने हमरूतबा नेताएं थमां बड़ा अगगे दस्सेआ गेआ ऐ। दक्खन कोरिया दे राष्ट्रपति ली जे-म्यांग 59 फीसद रेटिंग दे कन्नै दुई ते अर्जेटीना दे राष्ट्रपति जेवियर माइली त्रीये नम्बरै पर ना। सर्वेक्षण च हर इक देशै दी बालिग आबादी मझाटै बचारें दा आंकलन करने लेई 7एं ध्याडें दे औसत शोध दा इस्तेमाल कीता गेआ। अमरीका दी बिजनेस इंटेलिजेंस कंपनी मॉर्निंग कंसल्ट नै एह सर्वेक्षण कीता ऐ ते एह वैश्विक नेताएं दी ‘एप्रूव्ड रेटिंग ट्रेकर’ दा इक हिस्सा ऐ। मई, 2024 च लगातार त्रीऽ बारी प्रधानमंत्री बनने आह्ले श्री मोदी आलमी सतह दी इस दर्जेबंदी च प्रमुख थाहै पर न, ते एह उं’दी घरेलू लोकप्रियता ते बधदी अंतरराष्ट्री मान्यता गी दर्शादा ऐ। अमरीका दे राष्ट्रपति डॉनल्ड ट्रम्प इस सर्वेक्षण च 8मीं थाहै पर ना। उं’नेंगी छडी 44 फीसद रेटिंग मिली ऐ। प्रधानमंत्री मोदी हुं’दी एह उपलब्धि उं’दे राजनीतिक सफर च इक होर महत्वपूर्ण गैह ऐ। कल उं’नें अपने कार्यकाल दे चार जहार 79 दिन पूरे कीते। ओह इंदिरा गांधी होरें’गी पिच्छे छोड़दे होई भारत दे सब्भनें शा लम्मे समें तगर लगातार कार्यकाल आह्ले दुए प्रधानमंत्री बनी गे ना। प्रधानमंत्री मोदी हून देशै दे पैह्ले प्रधानमंत्री पंडित जवाहरलाल नेहरू हुं’दे थमां गै पिच्छे ना।

<><><><><><>

## IMD

भारती मौसम विभाग नै पच्छमी मध्य प्रदेश, पूर्वी राजस्थान ते गुजरात च अज्ज भारी थमां बड़ी मती भारी बरखा दा रेड अलर्ट जारी कीता ऐ। मौसम विभाग नै गलारया ऐ जे अगले 3 दिनें दरान मध्य भारत, पच्छमी तट ते आले-दोआले दे घाट आह्ले क्षेत्रें च मानसून दे सक्रिय रौहने दी मेद ऐ। विभाग नै अज्ज उत्तराखंड, पूर्वी मध्य प्रदेश, उप हिमालयई, पच्छिम बंगाल, सिक्किम, अरूणाचल प्रदेश, असम ते मेघालय च अज्ज भारी थमां बड़ी भारी बरखा दी पेशनगाई कीती ऐ।

<><><><><><>

## Chhatisgarh

छत्तीसगढ़ दी बीजापुर जिले च कल सुरक्षाबलें 4 माओवादियें गी मारी मकाया। जिंदियां लोथां बरामद करी लैतियां गेइयां ना। सुरक्षाबलें मौके परां सेल्फ लोडिंग राइफल सने भा मात्रा च हथियार बी बरामद कीते। जिले दे दक्खन-पच्छमी इलाकें च माओवादियें दी मौजूदगी दी खुफिया जानकारी मिलने मगरा सुरक्षाबलें दी इक सांझी टीम गी तलाशी अभियान लेई भेजेआ गेआ हा। जंदी संझा थमां गै सुरक्षाबलें ते नक्सलियें बशकार रूकी-रूकिये गोलाबारी चला’रदी ही।

<><><><><><>

## Thailand-Combodia Ceasefire

अमरीका दे राष्ट्रपति डोनाल्ड ट्रंप होरें आखेआ ऐ जे कंबोडिया ते थाईलैंड दे नेता युद्ध विराम पर गल्लबात करने लेई फौरी तौर पर मलाटी करने गितै राजी होई गे ना। श्री ट्रंप होरें दौनें मुल्लखें मझाटै त्रै दिनें थमां जारी संघर्ष दे बाद शांति स्थापत करने दी कोशश कीती ऐ। थाईलैंड दे प्रधानमंत्री फुमथाम वेचायाचाई होरें श्री ट्रंप हुं’दे प्रति आभार व्यक्त कीता ते आखेआ जे थाईलैंड युद्ध विराम करने पर सैद्धांतिक रूप कन्नै सैह्यत ऐ पर ओह चांहदे न जे कंबोडिया बी इससै इरादे कन्नै अगगे आवै। ट्रंप होरें

आखेआ जे उ'नें कंबोडिया दे प्रधानमंत्री 'हुन मनेत ते थाईलैंड दे प्रधानमंत्री फुमथाम हुं'दे कन्नै गल्लबात कीती ऐ ते उ'नेंगी चेतानी दित्ती ऐ कि जेगर संघर्ष जारी रौहदा ऐ तां ओह कुसै बी मुख कन्नै बपार समझौता नेई करडन। कंबोडिया ते थाईलैंड मझौट 13एं ब'रें च होए दे सबभनें शा जबरदस्त संघर्ष च 30 शा मते लोक मारे जाई चुके दे न ते इक लख 30 जहार लोक विस्थापत होए न।

<><><><><><>

### Chess

शतरंज च कोनेरू हम्पी ते हमवतन दिव्या देशमुख हुंदे बश्कार फिडे महिला विश्व कप 2025 दे फाइनल दी पैहली बाजी कल संझा जार्जिया दे बटुमी च ड्रॉ उप्पर खतम होई। दिव्या चिट्टे मोहरें कन्नै खेड्डा'रदी ही जदके कोनेरू काले मोहरें कन्नै। इस मैच दे ड्रॉ होने मगरा दवे खडारियें गी 0 इशारिया 5-0-5 दे अंक मिले दे न। फाइनल दा दुआ मुकाबला अज्ज खेड्डेआ जाग। एह अखिल भारती मुकाबला अगले ब'रे फिडे महिला कैंडिडेट्स प्रतियोगिता च थाहर पक्की करदा ऐ जित्थे विजेताएं गी विश्व चैंपियनशिप खिलाब लेई जू वेनजुन गी चनौती देने दा हक मिलोग। एह भारत च महिला शतरंज लेई महत्वपूर्ण मौका ऐ।

<><><><><><>